



王摩詰集卷下

永嘉張遜業有功

校註

江都黃

淳子篤梓行

五言律詩

奉和聖製賜史供奉曲江宴應制

侍從有鄒枚瓊筵就水開言陪栢梁宴新下建章
來對酒山河滿移舟草樹廻天文同麗日駐景惜
行杯

從岐王過楊氏別業應教

楊子談經所准王載酒過興闌啼鳥緩坐久落花
多逕轉迴銀燭林開散玉珂嚴城時未啓前路擁
笙歌

從岐王夜讌衛家山池應教

座客香貂滿宮娃綺幔張澗花輕粉色山月少燈
光積翠紗窻暗飛泉繡戶涼還將歌舞出歸路莫
愁長

和尹諫議史館山池

雲館接天居霓裳侍玉除春池百子外芳樹萬年

餘洞有僊人籙山藏太史書君恩深漢帝且莫上
空虛

同崔貞外秋宵寓直

建禮高秋夜承明候曉過九門寒漏徹萬井曙鍾
多月迴藏珠斗雲消出絳河更慚衰朽質南陌共
鳴珂

奉和楊駙馬六郎秋夜卽事

高樓月似霜秋夜鬱金堂對坐彈盧女同看舞鳳
凰少兒多送酒小玉更焚香結束平陽騎明朝入

建章

訓嚴少尹徐舍人見過不遇

公門暇日少窮巷故人稀偶值乘藍輦非關避白衣不知炊黍否誰解掃荆扉君但傾茶碗無妨騎馬歸

慕容承携素饌見過

紗帽烏皮几間居懶賦詩門看五柳識年筭六身知靈壽君王賜彫胡弟子炊空勞酒食饌特底解人願

訓慕容上

行行西陌返駐爐問車公挾轂雙官騎應門五尺僮老年如塞北強起離牆東爲報壺丘子來人道姓蒙

訓張少府

晚年唯好靜萬事不關心自顧無長策空知返舊林松風吹解帶山月照彈琴君問窮通理漁歌入浦深

喜祖三至留宿

門前洛陽客下馬拂征衣不在故人駕平生多掩
扉行人返深巷積雪帶餘暉早歲同袍者高車何
處歸

荅

祖詠

四年不相見相見復何爲握手言未畢却令傷別
離升堂還駐馬酌醴便呼兒語嘿自相對安用傍
人知

酬虞部蘇貞外過藍田別業不見留之作
貧居依谷口喬木帶荒村石路在迴駕山家誰候

門漁舟膠凍浦獵火燒寒原唯有白雲外踈鍾聞
夜猿

酬比部楊貞外暮宿琴臺朝躋書閣率爾
見贈之作

舊簡拂塵看鳴琴候月彈桃源迷漢姓松徑有秦
官空谷歸人少青山背日寒爇君棲隱處遙望白
雲端

酬賀四贈葛巾之作

野巾傳惠好茲貺重兼金嘉此幽棲物能齊隱吏

心早朝方暫挂晚沐復來簪坐覺囂塵遠思君共
入林

輞川閒居贈裴秀才迪

寒山轉蒼翠秋水日潺湲倚杖柴門外臨風聽暮
蟬渡頭餘落日墟里上孤烟復值接輿醉狂歌五
柳前

寄荊州張丞相

所思竟何在悵望深荆門舉世無相識終身思舊
恩方將與農圃藝植老丘園目盡南無鴈何由寄

一言

冬晚對雪憶胡居士家

寒更傳曉箭清鏡覽衰顏隔牖風驚竹開門雪滿
山灑空深巷靜積素廣庭閒借問袁安舍脩然尚
閉關

山居秋暝

空山新雨後天氣晚來秋明月松間照清泉石上
流竹喧歸浣女蓮動下漁舟隨意春芳歇王孫自
可留

終南別業

中歲頗好道晚家南山陲興來每獨往勝事空自知
行到水窮處坐看雲起時偶然值林叟談笑滯
還期

山居卽事

寂寞掩柴扉蒼茫對落暉鶴巢松樹遍人訪蕁門
稀綠竹含新粉紅蓮落故衣渡頭烟火起處處採
菱歸

韋給事山居

幽尋得此地詎有一人曾大壑隨堦轉羣山入戶
登庖厨出深竹印綬隔垂藤卽事辭軒冕誰云病
未能

歸嵩山作

清川帶長薄車馬去閒閒流水如有意暮禽相與
還荒城臨古渡落日滿秋山迢遞嵩高下歸來且
閉關

歸輞川作

谷口踈鍾動漁樵稍欲稀悠然遠山暮獨向白雲

歸菱蔓弱難定楊花輕易飛東臯春草色惆悵掩
柴扉

終南山

太一近天都連山到海隅白雲迴望合青靄入看
無分野中峰變陰晴衆壑殊欲投人處宿隔水問
樵夫

輞川間居

一從歸白社不復到青門時倚簷前樹遠看原上
村青菰臨水映白鳥向山翻寂寞於陵子桔槔方

灌園

春園卽事

宿雨乘輕屐春寒著弊袍開畦分白水間柳發紅
桃草際成基局林端舉桔槔還持鹿皮机日暮隱
蓬蒿

淇上卽事田園

屏居淇水上東野曠無山日隱桑柘外河明閭井
間牧童望村去獵犬隨人還靜者亦何事荆扉乘
書關

與盧象集朱家

主人能愛客終日有逢迎
貫得新豐酒復聞秦女
箏柳條踈客舍槐葉下秋城
語笑且爲樂吾將達此生

過福禪師蘭若

巖壑轉微逕雲林隱法堂
羽人飛奏樂天女跪焚
香竹外峰偏曙藤陰水更涼
欲知禪坐久行路長
春芳

黎拾遺昕裴迪見過秋夜對雨之作

促織鳴已急輕衣行向重
寒燈坐高館秋雨聞踈
鐘白法調狂象玄言問老龍
何人顧蓬逕空愧牛
羊蹤

晚春嚴少尹與諸公見過

松菊荒三逕圖書共五車
烹葵邀上客看竹到貧
家鵲乳先春草鶯啼過落花
自憐黃髮暮一倍惜
年華

過感化寺曇興上人山院

暮持筇竹杖相待虎溪頭
催客聞山響歸房逐水

流野花叢發好谷鳥一聲幽夜坐空村寂松風直似秋

同詠

裴迪

不遠灞陵邊安居向十年入門穿竹逕留客聽山泉鳥嘯深林裏心閒落照前浮名竟何益從此願棲禪

夏日過青龍寺謁操禪師

龍鐘一老翁徐步謁禪宮欲問義心義遙知空病空山河天眼裏世界法身中莫恠銷炎熱能生大

地風

同詠

裴迪

安禪一室內左右竹亭幽有法知不染無言誰敢酬鳥飛爭向夕蟬噪已先秋煩暑自茲適清涼何所求

鄭果州相過

麗日照殘春初晴草木新牀前磨鏡客樹下灌園人五馬驚窮巷雙童逐老身中厨辨麤飯當恕阮家貧

過香積寺

不知香積寺數里入雲峰古木無人徑深山何處
鐘泉聲咽危石日色冷青松薄暮空潭曲安禪制
毒龍

過崔駙馬山池

畫樓吹笛妓金椀酒家胡錦石稱貞女青松學大
夫脫貂貫桂醕射鴈與山厨聞道高陽會愚公谷
正愚

送李判官赴江東

聞道皇華使方隨皂蓋臣封章通左語冠冕化文
身樹色分楊子潮聲滿富春遙知辨壁吏恩到泣
珠人

送封太守

忽解羊頭削聊馳熊首轡揚舲發夏口按節向吳
門帆映丹陽郭楓攢赤岸村百城多候吏露冕一
何尊

送嚴秀才還蜀

寧親爲令子似舅卽賢甥別路經花縣還鄉入錦

城山臨青塞斷江向白雲平獻賦何時至明君憶
長卿

送張判官赴河西

單車曾出塞報國敢邀勲見逐張征虜今思霍冠
軍沙平連白雪蓬卷入黃雲慷慨倚長劍高歌一
送君

送岐州源長史歸

同在崔常侍幕中時常侍已歿

握手一相送心悲安可論秋風正蕭索客散孟嘗
門故驛通槐里長亭下檜原征西舊旌節從此向

河源

送張道士歸山

先生何處去王屋訪茅君別婦留丹訣驅雞入白
雲人間苦難住天上復離羣當作遼城鶴仙歌使
爾聞

同崔興宗送瑗公

言從石菌閣新下穆陵關獨向池陽去白雲留故
山綻衣秋日裏洗鉢古松間一施傳心法唯將戒
定還

同詠

崔興宗

行苦神亦秀冷然溪上松銅瓶與竹杖來自祝融
峰常願入靈嶽藏經訪遺蹤南歸見長老且爲說
心胷

送錢少府還藍田

草色日向好桃源人去稀手持平子賦目送老萊
衣每候山櫻發時同海燕歸今年寒食酒應得返
柴扉

留別錢起

卑棲却得性每與白雲歸徇祿仍懷橘看山免採
薇暮禽先去馬新月待開扉霄漢時回首知音青
瑣闥

送丘爲往唐州

宛洛有風塵君行多苦辛四愁連漢水百口寄隨
人槐色陰清晝楊花惹暮春朝端肯相送天子繡
衣臣

留別丘爲

歸鞍白雲外繚繞出前山今日又明日自知心不

閒親勞簪組送欲趁鶯花還一步一迴首遲遲向
近關

送元中丞轉運江淮

薄稅歸天府輕徭賴使臣歡沾賜帛老恩及卷綃
人去問珠官俗來經石劫春東南高亭上莫使有
風塵

送崔九興宗遊蜀

送君從此去轉覺故人稀徒御猶迴首田園方掩
扉出門當旅食中路授寒衣江漢風流地遊人何

處歸

送崔興宗

已恨親皆遠誰憐友復稀君王未西顧遊宦盡東
歸塞迴山河淨天長雲樹微方同菊花節相待洛
陽扉

送平淡然判官

不識陽關路新從定遠侯黃雲斷春色畫角起邊
愁瀚海經年到交河出塞流須令外國使知飲月
支頭

送孫秀才

帝城風日好況復建平家玉枕雙文簾金盤五色
瓜山中無魯酒松下飯胡麻莫厭田家苦歸期遠
復賒

送劉司直赴安西

絕域陽關道胡沙與塞塵三春時有鴈萬里少行
人首宿隨天馬蒲萄逐漢臣當令外國懼不敢覓
和親

送趙都督赴代州

天官動將星漢上柳條青萬里鳴刁斗三軍出井
陘忘身辭鳳闕報國取龍庭豈學書生輩窻間老
一經

送方城韋明府

遙思葭菼際寥落楚人行高鳥長淮水平蕪故郢
城使車聽雉乳縣鼓應雞鳴若見州從事無嫌手
扳迎

送李員外賢郎

少年何處去負米上銅梁借問阿戎父知爲童子

郎魚牋請詩賦
撞布作衣裳
意以扶衰病
歸來幸可將

送梓州李使君

萬壑樹參天
千山響杜鵑
山中一夜雨
樹抄百重泉
漢女輸檀布
巴人訟芋田
文翁翻教授
不敢倚先賢

送張五諲歸宣城

五湖千萬里
沉復五湖西
漁浦南陵郭
人家春穀溪
欲歸江淼淼
未到草凄凄
憶想蘭陵鎮
可宜猿

更啼

送友人南歸

萬里春應盡
三江鴈亦稀
連天漢水廣
孤客郢城歸
鄖國稻苗秀
楚人菰米肥
懸知倚門望
遙識老萊衣

送賀遂負外外甥

南國有歸舟
荆門沂上流
蒼茫葭菼外
雲水與昭丘
檣帶城烏去
江連暮雨愁
猿聲不可聽
莫待楚山秋

送楊長史赴果州

袞斜不容幘之子去何之鳥道一千里猿啼十二
時官橋祭酒客山木女郎祠別後同明月君應聽
子規

送邢桂州

鏡吹喧京口風波下洞庭赭圻將赤岸擊汰復揚
舲日落江湖白潮來天地青明珠歸合浦應逐使
臣星

送宇文三赴河西充行軍司馬

橫吹雜繁笳邊風卷塞沙還聞田司馬更逐李輕
車蒲壘成秦地莎居屬漢家當令大戎國朝聘學
昆耶

送孫二

郊外誰相送夫君道術親書生鄒魯客才子洛陽
人祖席依寒草行車起暮塵山川何寂寞長望淚
沾巾

送崔三往密州覲省

南陌去悠悠東郊不少留同懷扇枕戀獨念倚門

愁路遶天山雪家臨海樹秋魯連功未報且莫蹈
滄洲

送丘爲落第歸江東

憐君不得意況復柳條春爲客黃金盡還家白髮
新五湖三畷宅萬里一歸人知爾不能薦羞稱獻
納臣

春日上方卽事

好讀高僧傳時看辟穀方鳩形將刻杖龜殼用支
牀柳色春山映梨花夕鳥藏北窻桃李下閒坐但

焚香

漢江臨汎

楚塞三湘接荆門九派通江流天地外山色有無
中郡邑浮前浦波瀾動遠空襄陽好風日留醉與
山翁

登辨覺寺

竹逕從初地蓮峰出化城窻中三楚盡林上九江
平輦草承趺坐長松響梵聲空居法雲外觀世得
無生

涼州郊外遊望

野老才三戶邊村少四鄰
婆娑依里社簫鼓賽田
神灑酒澆芻狗焚香拜木人
女巫紛屢舞羅襪自
生塵

觀獵

風勁角弓鳴將軍獵渭城
草枯鷹眼疾雪盡馬蹄
輕忽過新豐市還歸細柳營
廻看射鵰處千里暮
雲平

汎前陂

秋空自明迥汎復遠人間暢
以沙際鶴兼之雲外
山澄波淡將夕清月皓方閒
此夜任孤棹夷猶殊
未還

游李山人所居因題屋壁

世上皆如夢狂來或自歌
問年松樹老有地竹林
多藥倩韓康賣門容尚子
過翻嫌枕席上無那白
雲何

登河北城樓作

井邑傳巖上客亭雲霧間
高城眺落日極浦映蒼

山岸火孤舟宿漁家夕鳥還寂寥天地暮心與廣
川閒

登裴迪秀才小臺作

端居不出戶滿目望雲山落日鳥邊下秋原人外
閒遙知遠林際不見此簷間好客多乘月應門莫
上關

被出濟州

微官易得罪謫去濟川陰執政方持法明君無此
心閭閻河潤上井邑海雲深縱有歸來日各愁年

鬢侵

千塔主人

逆旅逢佳節征帆未可前窓臨汴河水門渡楚人
船雞犬散墟落桑榆蔭遠田所居人不見枕席生
雲烟

晚春歸思

新粧可憐色落日卷羅帷鑪氣清珍簾墻陰上玉
墀春蟲飛網戶暮雀隱花枝向晚多愁思閒窓桃
李時

使至塞上

單車欲問邊，屬國過居延。
征蓬出漢塞，歸鴈入胡天。
大漠孤烟直，長河落日圓。
蕭關逢候吏，都護在燕然。

戲題示蕭氏外甥

憐爾解臨池，渠侖未學詩。
老夫何足似，弊宅倘因之。
蘆笋穿荷葉，菱花罨鴈兒。
郗公不易勝，莫著外家欺。

秋夜獨坐

獨坐悲雙鬢，空堂欲二更。
雨中山果落，燈下草虫鳴。
白髮終難變，黃金不可成。
欲知除老病，唯有學無生。

待儲光羲不至

重門朝已啓，起坐聽車聲。
要欲聞清珮，方將出戶迎。
晚鍾鳴上苑，疎雨過春城。
了自不相顧，臨堂復空情。

聽宮鶯

春樹遶宮牆，春鶯轉曙光。
忽驚啼暫斷，移處弄還

長隱葉樓承露攀花出未央遊人未應返爲此思
故鄉

早朝

柳暗百花明春深五鳳城城烏睥睨曉宮井轉
聲方朔金門侍班姬玉輦迎仍聞遣方士東海訪
蓬瀛

愚公谷三首

愚谷與誰去唯將黎子同非須一處住不那兩心
空寧問春將夏誰論西復東不知吾與子若箇是

愚公

吾家愚谷裏此谷本來平雖則行無跡還能響應
聲不隨雲色暗只待日光明緣底名愚谷都由愚
所成

借問愚公公與君聊一尋不尋翻到谷此谷不離
心行處曾無險看時豈有深寄言塵世客何處欲
歸臨

雜詩

雙燕初命子五桃初作花王昌是東舍宋玉次西

家小小能織綺時時出浣沙親勞使君問南陌駐
香車

過秦皇墓

古墓成蒼嶺幽宮象紫臺星辰七曜隔河漢九泉
開有海人寧渡無春鴈不迴更聞松韻切疑是大
夫哀

故太子太師徐公挽歌四首

功德冠羣英彌綸有大名軒皇用風后傳說是星
精就第優遺老來朝詔不名留侯常辟穀何苦不

長生

謀猷爲相國翊贊奉乘輿劍履升前殿貂蟬託後
車齊侯疏土宇漢室賴圖書僻處留田宅仍纔十
頃餘

舊里趨庭日新年置酒辰聞詩鸞渚客獻賦鳳樓
人北闕辭明主東堂哭大臣猶思御朱輅不惜汗
車茵

久踐中台座終登上將壇誰言斷車騎空憶盛衣
冠風日咸陽慘笳簫渭水寒無人當便闕應罷太

師官

故西河郡杜太守挽歌三首

天上去西征雲中護北平生擒白馬將連破黑鵬
城忽見芻靈苦徒聞竹使榮空留左氏傳誰繼卜
商名

返葬金符守同歸石窠棲卷衣悲畫翟持髮待鳴
雞容衛都人慘山川駟馬嘶猶聞隴上客相對哭
征西

塗芻去國門祕器出東園太守留金印夫人罷錦

軒旌旄轉衰木簫鼓上寒原墳樹應西靡長思魏
闕恩

故南陽夫人樊氏挽歌

錦衣餘翟弗繡轂罷魚軒淑女詩長在天人法尚
存疑笳隨曉旆行哭向秋原歸去將何見誰能返
戟門

送奚侍郎夫人寇氏二首

束帶將朝日鳴環映牖辰能令明諫主相勸識賢
人遺挂空留壁廻文日覆塵金鸞將畫柳何處更

東坡圖詩所
王厚詩集卷下
新繩

知春
女史悲彤管夫人罷錦軒上瑩占二室行哭度千
門秋日光能淡寒川波自翻一朝成萬古松栢暗
平原

恭懿太子挽歌五首

何悟藏環早纔知拜璧年
狎天王子去對日聖君
憐樹轉宮猶出笳悲馬不前
雖蒙絕馳道京兆別
開阡

蘭殿新恩切椒宮夕臨幽白雲隨鳳管明月在龍

樓人向青山哭天臨渭水愁雞鳴常問膳今恨玉
京留

騎吹凌霜發旌旗夾路陳愷容金節護冊命玉符
新傳母悲香祿君家擁畫輪射熊今夢帝秤象問
何人

蒼舒留帝寵子晉有仙才五歲過人智三天使鶴
催心悲四祿館目斷望思臺若道長安近何為更
不來

西望昆池濶東瞻下杜平山朝豫章館樹轉鳳凰

東坡圖詩所
王厚詩集卷下
江繩

東坡圖書所
城五校連旗色千門疊鼓聲金環如有驗還向畫
堂生

七言律詩

奉和聖製從蓬萊向興慶閣道中留春雨
中春望之作應制

渭水自縈秦塞曲黃山舊遶漢宮斜鑾輿迥出仙
門柳閣道迴看上苑花雲裏帝城雙鳳闕雨中春
樹萬人家爲乘陽氣行時令不是宸遊重物華
大同殿生玉芝龍池上有慶雲百官共覩

聖恩便賜宴樂敢書卽事

欲笑周文歌宴鎬遙輕漢武樂橫汾豈如玉殿生
三秀詎有銅池出五雲陌上堯樽傾北斗樓前舜
樂動南薰共歡天意同人意萬歲千秋奉聖君

勅賜百官櫻桃

芙蓉闕下會千官紫禁朱櫻出上闌總是寢園春
薦後非關御苑鳥銜殘歸鞍競帶青絲籠中使頻
傾赤玉盤飽食不須愁內熱大官還有蔗漿寒

和

右補闕崔興宗

未央朝謁正逶迤天上櫻桃錫此時朱實初傳九
華殿繁花舊雜萬年枝未勝晏子江南橘莫比潘
家大谷梨聞道令人好顏色神農本草自應知

勅借岐王九成宮避暑應教

帝子遠辭丹鳳闕天書遙借翠微宮隔窓雲霧生
衣上卷幔山泉入鏡中林下水聲喧語笑巖間樹
色隱房櫳仙家未必能勝此何處吹簫向碧空

和賈舍人早朝大明宮之作

絳幘雞人送曉籌尚衣方進翠雲裘九天閶闔開

宮殿萬國衣冠拜冕旒日色纔臨仙掌動香烟欲
傍衮龍浮朝罷須裁五色詔珮聲歸向鳳池頭

和太常韋主簿五郎溫湯寓目

漢主離宮接露臺秦川一半夕陽開青山盡是朱
旗繞碧磧翻從玉殿來新豐樹裏行人度小苑城
邊獵騎廻聞道甘泉能獻賦懸知獨有子雲才

苑舍人能書梵字兼達梵音皆曲盡其妙
戲爲之贈

名儒待詔滿公車才子爲郎典石渠蓮花法藏心

懸悟貝葉經文手自書楚詞共許勝楊馬梵字何
人辨魯魚故舊相望在三事願君莫厭承明廬

苑咸達 并序

王貞外兄以予嘗學天竺書有戲題見贈然王兄
當代詩匠又精禪理枉採知音形於雅作輒走筆
以酬焉且久未遷因而嘲及

蓮花梵字本從天華省仙郎早悟憚三點成伊猶
有想一觀如幻自忘筌爲文已變當時體入用還
推問氣賢應同羅漢無名欲故作馮唐老歲年

重酬苑郎中 并序

頃輒奉贈忽枉見酬叙末云且久不遷因而嘲及
詩落句云應同羅漢無名欲故作馮唐老歲年亦
解嘲之類也

何幸含香奉至尊多慙未報主人恩草木盡能酬
雨露榮枯安敢問乾坤仙郎有意憐同舍丞相無
私斷掃門楊子解嘲徒自遣馮唐已老復何論

酬郭給事

洞門高閣靄餘輝桃李陰陰柳絮飛禁裏踈鐘官

舍晚省中啼鳥吏人稀晨搖玉珮趨金殿夕奉天
書拜瑣闥強欲從君無那老將因卧病解朝衣

既蒙宥罪旋復拜官伏感聖恩竊書鄙意
兼奉簡新除使君等諸公

忽蒙漢詔還冠冕始覺殷王解網羅日比皇明猶
自暗天齊聖壽未云多花迎喜氣皆知笑鳥識歡
心亦解歌聞道百城新珮印還來雙闕共鳴珂

酌酒與裴迪

酌酒與君君自寬人情翻覆似波瀾白首相知猶

按劔朱門先達笑彈冠草色全經細雨濕花枝欲
動春風寒世事浮雲何足問不如高卧且加餐

輞川別業

不到東山向一年歸來纔及種春田雨中草色綠
堪染水上桃花紅欲然優婁比丘經論學偃僂丈
人鄉里賢披衣倒屣且相見相歡語笑衡門前

早秋山中作

無才不敢累明時思向東溪守故籬豈厭尚平婚
嫁早却嫌陶令去官遲草間蛩響臨秋急山裏蟬

聲薄暮悲寂寞柴門人不到空林獨與白雲期

積雨輞川莊作

積雨空林烟火遲蒸藜炊黍餉東菑漠漠水田飛
白鷺陰陰夏木嘒黃鸝山中習靜觀朝槿松下清
齋折露葵野老與人爭席罷海鷗何事更相疑

過乘如禪師蕭居士嵩丘蘭若

無着天親弟與兄嵩丘蘭若一峰晴食隨鳴磬巢
鳥下行踏空林落葉聲迸水定侵香案濕雨花應
共石牀平深洞長松何所有儼然天竺古先生

春日與裴迪過新昌里訪呂逸人不遇

桃源一向絕風塵柳市南頭訪隱淪到門不敢題
凡鳥看竹何須問主人城外青山如屋裏東家流
水入西鄰閉戶著書多歲月種松皆作老龍鱗

同詠

裴迪

恨不逢君出荷葉青松白屋更無他陶令五男曾
不有蔣生三逕枉相過芙蓉曲沼春流滿薜荔成
帷晚靄多聞說桃源好迷客不如高卧眄庭柯

送方尊師歸嵩山

仙官欲往九龍潭毛節朱幡倚石龕山壓天中半
天上洞穿江底出江南瀑布杉松常帶雨夕陽彩
翠忽成嵐借問迎來雙白鶴已曾衡岳送蘇耽

送楊少府貶郴州

明到衡山與洞庭若爲秋月聽猿聲愁看北渚三
湘遠惡說南風五兩輕青草瘴時過夏口白頭浪
裏出盜城長沙不火留才子賈誼何須弔屈平

聽百舌鳥

上蘭門外草萋萋未央宮中花裏樓亦有相隨過

御苑不知若箇向金堤入春解作千般語拂曙能
先百鳥啼萬戶千門應覺曉建章何必聽鳴雞

出塞作

居延城外臘天驕白草連天野火燒暮雲空磧時
驅馬秋日平原好射鵬護羌校尉朝乘障破虜將
軍夜渡遼玉靶角弓珠勒馬漢家將賜霍嫖姚

五言排律

奉和聖製慶玄元皇帝玉像之作應制

明君夢帝先寶命上齊天秦后徒聞樂周王耻卜

年玉京移大像金錄會羣仙承露調天供臨空敞
御筵斗迴迎壽酒山近起爐烟願奉無爲化齊心
學自然

奉和聖製與太子諸王三月三日龍池春
禊應制

故事修春禊新宮展豫遊明君移鳳輦太子出龍
樓賦掩陳王作杯如洛水流金人來捧劍畫鷁去
迴舟苑樹浮宮闕天池照冕旒宸章在雲表垂象
滿皇州

奉和聖製上巳於望春亭觀禊飲應制

長樂青門外宜春小苑東樓開萬戶上輦過百花
中畫鷁移仙妓金貂列上公清歌邀落日妙舞向
春風渭水明秦甸黃山入漢宮君王來後禊灞漣
亦朝宗

奉和聖製幸玉霄公主山莊因題石壁十
韻之作應制

碧落風烟外瑤臺道路賒如何連帝苑別自有仙
家比地迴鑾駕緣溪轉翠華洞中開日月窻裏發

雲霞庭養冲天鶴，溪留上漢查。種田生白玉，泥竈化丹砂。谷靜泉逾響，山深日易斜。御羹和石髓，香飯進胡麻。大道今無外，長生詎有涯。還瞻九霄上，來往五雲車。

奉和聖製暮春送朝集使歸郡應制

萬國仰宗周，衣冠拜冕旒。玉乘迎大客，金節送諸侯。祖席傾三省，褰帷向九州。楊花飛上路，槐色蔭通溝。來預鈞天樂，歸分漢主憂。宸章類河漢，垂象滿中州。

三月三日曲江侍宴應制

萬乘親齋祭，千官喜豫遊。奉迎從上苑，祓禊向中流。草樹連容衛，山河對冕旒。畫旗搖浦淑，春服滿汀洲。仙樂龍媒下，神臯鳳蹕留。從今億萬歲，天寶紹春秋。

奉和聖製十五夜燃燈繼以酺宴應制

上路笙歌滿，春城漏刻長。遊人多晝日，明月讓燈光。魚鑰通翔鳳，龍輿出建章。九衢陳廣樂，百福透名香。仙妓來金殿，都人遶玉堂。定應偷妙舞，從此

學新粧奉引迎三事司儀列萬方願將天地壽同
以獻君王

奉和聖製重陽節宰臣及羣官上壽應制
四海方無事三秋大有年百生逢此日萬壽願齊
天芍藥和金鼎茱萸插玳筵玉堂開右个天樂動
宮懸御柳踈秋景城鴉拂曙烟無窮菊花節長奉
栢梁篇

三月三日勤政樓侍宴應制

綵仗連宵合瓊樓拂曙通年光三月裏宮殿百花

中不數秦王日誰將洛水同酒筵嫌落絮舞袖怯
春風天保無爲德人歡不戰功仍臨九衢宴更達
四門聰

和陳監四郎秋雨中思從弟據

嫋嫋秋風動淒淒烟雨繁聲連鳩鵲觀色暗鳳凰
原細柳踈高閣輕槐落洞門九衢行欲斷萬井寂
無喧忽有愁霖唱更陳多露言平原思令弟康樂
謝賢昆逸興方三接衰顏強七奔相如今老病歸
守茂陵園

和僕射晉公扈從温湯

天子幸新豐旌旗渭水東寒山天仗裏温谷幔城
中奠玉羣仙座焚香太一宮出遊逢牧馬罷獵有
非熊上宰無爲化明時太古同靈芝三秀紫陳粟
萬箱紅王禮尊儒教天兵小戰功謀猷歸哲匠詞
賦屬文宗司諫方無闕陳詩且未工長吟吉甫頌
朝夕仰清風

和宋中丞夏日遊福賢觀天長寺卽陳左
相宅所施之作

已相殷王國空餘尚父溪釣磯開月殿築道出雲
梯積水浮香象深山鳴白雞虛空無妓樂衣服製
虹霓墨點三千界丹飛六一泥桃源勿遽返再訪
恐君迷

沈十四拾遺新竹生讀經處同諸公之作

閒居日清靜修竹自檀欒嫩節留餘籜新叢出舊
闌細枝風響亂踈影月光寒樂府栽龍笛漁家伐
釣竿何如道門裏青翠拂仙壇

贈東岳焦鍊師

先生千歲餘五嶽遍曾居遙識齊侯鼎新過王母
廬不能師孔墨何事問長沮玉管時來鳳銅盤卽
釣魚竦身空裏語明目夜中書自有還丹術時論
太素初頻蒙露版詔時降軟輪車山靜泉逾響松
高枝轉踈支願問樵客世上復何如

贈焦道士

海上遊三島淮南預八公坐知千里外跳向一壺
中縮地朝珠闕行天使玉童飲人聊割酒送客乍
分風天老能行氣吾師不養空謝君徒雀躍無可

問鴻濛

投道一師蘭若宿

一公栖太白高頂出雲烟梵流諸壑遍花雨一峰
偏迹爲無心隱名因立教傳鳥來還語法客去更
安禪晝涉松露盡暮投蘭若邊洞房隱深竹清夜
聞遙泉向是雲霞裏今成枕席前豈唯暫留宿服
事將窮年

山中示弟

山林吾喪我冠帶爾成人莫學嵇康懶且安原憲

貧山陰多北戶泉水在東隣緣合妄相有性空無
所親安知廣成子不是老夫身

韋侍郎山居

幸忝君子顧遂陪塵外蹤閒花滿巖谷瀑水映杉
松啼鳥忽臨澗歸雲時抱峰良遊盛簪紱繼跡多
夔龍詎枉青門道胡聞長樂鍾清晨去朝謁車馬
何從容

田家

舊穀行將盡良田未可希老年方愛粥卒歲且無

衣雀乳青苔井雞鳴白板扉柴車駕羸犂草屨牧
豪豨多雨紅榴折新秋綠芋肥餉田桑下憇旁舍
草中歸住處名愚谷何煩問是非

過盧賁外宅看飯僧共題七韻

三賢異七賢青眼慕青蓮乞飯從香積栽木學水
田上人飛錫杖檀越施金錢趺坐簷前日焚香竹
下烟寒空法雲地秋色淨居天身逐因緣法心過
次第禪不須愁日暮自有一燈燃

濟州過趙叟家宴

東晉圖書不
五原詩集卷下
三五
新編
雖與人境接閉門成隱居道言莊叟事儒行魯人
餘深巷斜暉靜閒門高柳踈荷鋤修藥圃散帙曝
農書上客搖芳翰中厨饋野蔬夫君第高飲景晏
出林間

青龍寺曇壁上人兄院集 并序

吾兄大開蔭中明徹物外以定力勝敵以惠用解
嚴深居僧坊傍俯人里高原陸地下映芙蓉之池
竹林果園中秀菩提之樹八極氛霧萬彙塵息太
虛寥廓南山爲之端倪皇州蒼茫渭水貫於天地

經行之後跌坐而開升堂梵筵餌客香飯不起而
遊覽不風而清涼得世界於蓮花記文章於貝葉
時江寧大兄持片石命維序之詩五韻坐上成
高處敞招提虛空詎有倪坐看南陌騎下聽秦城
雞眇眇孤烟起芊芊遠樹齊青山萬井外落日五
陵西眼界今無染心空安可迷

同詠

王縉

林中空寂舍階下終南山高卧一牀地廻看六合
間浮雲幾處滅飛鳥何時還問義天人接無心世

界閒誰知大隱客兄弟自追攀

王昌齡

本來清淨所竹樹引幽陰
簷外含山翠人間出世
心圓通無有象聖境不能侵
真是吾兄法何妨友
弟深天香自然會靈異
識鐘音

裴迪

靈境信爲絕法堂出塵氛
自然成高致向下看浮
雲迤邐峰岫列參差
閭井分林端遠堞見風末
踈鐘聞吾師久禪寂在
世超人羣

春過賀遂貞外藥園

前年槿籬故新作藥欄
成香草爲君子名花是長
卿水穿盤石透藤繫古松
生書畏開厨走來蒙倒
屣迎蔗漿菰米飯莠醬露
葵羹頗識灌園意於陵
不自輕

河南嚴尹弟見宿弊廬訪別人賦十韻

上客能論道吾生學養蒙
貧交世情外才子古人
中冠上方簪豸車邊已畫
熊拂衣迎五馬垂手憑
雙童花醪和松屑茶香透
竹叢薄霜澄夜月殘雪

帶春風古壁蒼苔黑寒山遠燒紅眼看東候別心
事北川同爲學輕先輩何能訪老翁欲知今日後
不樂爲車公

送秘書晁監還日本國

積水不可極安知滄海東九州何處遠萬里若乘
空向國唯看日歸帆但信風鰲身映天黑魚眼射
波紅鄉樹扶桑外主人孤島中別離方異域音信
若爲通

送禰郎中

東郊春草色驅馬去悠悠況復鄉山外猿啼湘水
流島夷傳露坂江館候鳴騶卉服爲諸吏珠官拜
本州孤鶯吟遠墅野杏發山郵早晚方歸奏南中
纔忌秋

送熊九赴任安陽

魏國應劉後寂寥文雅空漳河如舊日之子繼清
風阡陌銅臺下閭閻金虎中送車盈灞上輕騎出
關東相去千餘里西園明月同

送李太守赴上洛

商山包楚鄧積翠藹沉沉驛路飛泉灑關門落照
深野花開古戍行客響空林板屋春多雨山城晝
欲陰丹泉通號略白羽抵荆岑若見西山爽應知
黃綺心

遊化感寺

翡翠香烟合琉璃寶地平龍宮連棟宇虎穴傍簷
楹谷靜惟松響山深無鳥聲瓊峰當戶拆金澗透
林鳴郢路雲端迥秦川雨外晴鴈王銜果獻鹿女
踏花行抖擻辭貧里歸依宿化城繞籬生野蕨空
館發山櫻香飯青菰米嘉蔬綠芋羹誓陪清梵末
端坐學無生

遊悟真寺

聞道黃金地仍開白玉田擲山移巨石呪嶺出飛
泉猛虎同三逕愁猿學四禪買香燃綠桂乞火踏
紅蓮草色遙霞上松聲汎月邊山河窮百二世界
滿三千梵宇聊憑視王城遂渺然灞陵纔出樹渭
水欲連天遠縣分諸郭孤村起白烟望雲思聖主
披霧憶羣賢薄宦慙尸素終身擬尚玄誰知草菴

客曾和栢梁篇

與蘇盧二員外期游方丈寺而蘇不至因有是作

共仰頭陀行能忘世諦情迴看雙鳳闕相去一牛
鳴法向空林說心隨寶地平手中花艷淨香帔稻
畦成聞道邀同舍相期宿化城安知不來往翻得
似無生

曉行巴峽

際曉投巴峽餘春憶帝京晴江一女浣朝日衆雞

鳴水國舟中市山橋樹杪行登高萬井出眺迥二
流名人作殊方語鶯爲舊國聲賴諳山水趣稍解
別離情

清如玉壺冰

藏冰玉壺裏冰水類方諸未共銷丹日還同照綺
疏抱明中不隱會淨外疑虛氣似庭霜積光言砌
月餘曉凌飛鵲鏡宵映聚螢書若向夫君比清心
尚不如

春日直門下省早朝

騎省直明光雞鳴謁建章遙聞侍中佩聞識令君
香玉漏隨銅吏天書拜夕郎旌旗映閭闔歌吹滿
昭陽官舍梅初紫宮門柳欲黃願將遲日意同與
聖恩長

雜詩

朝因折楊柳相見洛城隅楚國無如妾秦家自有
夫對人傳玉腕映燭解羅襦人見東方騎皆言夫
婿殊持謝金吾子煩君提玉壺

上張令公

珥筆趨丹陛垂璫上玉除步簷青瑣闥方憶畫輪
車市閱千金字朝開五色書致君光帝典薦士滿
公車伏奏迴金駕橫經重石渠從茲罷角抵且復
幸儲胥天統知堯後王章笑魯初匈奴遙俯伏漢
相儼簪裾賈生非不遇汲黯自堪踈學易思求我
言詩或起予嘗從大夫後何惜隸人餘

哭褚司馬

妄識皆心累浮生定死媒誰言老龍吉未免白牛
災故有求仙藥仍餘遁俗杯山川秋樹苦窻戶夜

泉哀尚憶青驪去寧知白馬來漢臣修史記莫蔽
褚生才

過沈居士山居哭之

楊朱來此哭桑扈返於真獨自成千古依然舊四
鄰間簷喧鳥雀故榻滿埃塵曙月孤鶯囀空山五
柳春野花愁對客泉水咽迎人善卷明時隱黔婁
在日貧逝川嗟爾命丘井嘆吾身前後徒言隔相
悲詎幾晨

哭祖六自虛

否極嘗聞泰嗟君獨不然憫凶纔稚齒羸疾主中
年餘力文章秀生知禮樂全翰留天帳覽詞入帝
宮傳國訝終軍小人知賈誼賢公卿盡虛左朋識
共推先不恨依窮轍終期濟巨川才雄望羔鴈壽
促背貂蟬福善聞前錄殲良昧上玄何辜鍛鸞翮
何事與龍泉鵬起長沙賦麟終曲阜編城中君道
廣海內我情偏乍失疑猶見沉思悟絕緣生前不
忍別死後向誰宣爲此情難盡彌令憶更纏本家
清渭曲歸葬舊塋邊永去長安道徒開京兆阡旌

車出郊甸鄉國隱雲天定作無期別寧同舊日旋
候門家屬苦行路國人憐送客哀終進征途泥復
前贈言爲挽曲奠席是離筵念昔同携手風期不
變指南山俱隱逸東洛類神仙未省音容間那堪
生死遷花時金谷飲月夜竹林眠滿地傳都賦傾
朝看藥船羣公咸屬目微物敢齊肩謬合同人旨
而將玉樹連不期先挂劍長恐後施鞭爲善吾無
矣知音子絕焉琴聲縱不沒終亦斷悲絃

五言絕句

輞川集 并序

余別業在輞川山谷其遊止有孟城坳華子岡文
杏館斤竹嶺鹿柴木蘭柴茆泝宮槐陌臨湖亭
南垞歌湖柳浪藥家瀨金屑泉白石灘北垞竹里
館辛夷塢漆園椒園等與裴迪閑暇各賦絕句云
爾

孟城坳

新家孟城口古木餘衰柳來者復爲誰空悲昔人
有

往 結廬古城下時登古城上古城非疇昔今人自來

裴迪

華子岡

極 飛鳥去不窮連山復秋色上下華子岡惆悵情何

裴迪

衣 落日松風起還家草露晞雲光侵履跡山翠拂人

文杏館

雨 文杏栽為梁香茅結為宇不知棟裏雲去作人間

裴迪

顧 迢迢文杏館躋攀日已屢南嶺與北湖前看復迴

斤竹嶺

知 檀藥映空曲青翠漾漣漪暗入商山路樵人不可

明流紆且直綠篠密復深一徑通山路行歌望舊
岑

鹿柴

空山不見人但聞人語響返景入深林復照青苔
上

裴迪

日夕見寒山便為獨往客不知深林事但有麕麕
跡

木蘭柴

秋山斂餘照飛鳥逐前侶彩翠時分明夕嵐無處
所

裴迪

蒼蒼落日時鳥聲亂溪水綠溪路轉深幽興何時
已

茱萸泚

結實紅且綠復如花更開山中儻留客置此芙蓉
杯

飄香亂椒桂布葉間檀藥雲日雖迴照森沉猶自
寒

裴迪

宮槐陌

仄徑蔭宮槐幽陰多綠苔
鴈門但迎掃畏有山僧
來

裴迪

門前宮槐陌是向歌湖道
秋來山雨多落葉無人
掃

臨湖亭

輕舸迎上客悠悠湖上來
當軒對樽酒四面芙蓉
開

裴迪

當軒彌滉漾孤月正徘徊
谷口猿聲發風傳入戶
來

南垞

輕舟南垞去北垞森難卽
隔浦望人家遙遙不相
識

孤舟信一泊南垞湖水岸落日下崦嵫清波殊淼
漫

裴迪

歌湖

吹簫凌極浦日暮送夫君湖上一迴首青山卷白
雲

裴迪

空濶湖水廣青熒天色同艤舟一長嘯四面來清
風

柳浪

分行接綺樹倒影入清漪不學御溝上春風傷別
離

裴迪

映池同一色逐吹散如絲結陰旣得地何謝陶家
時

藥家瀨

颯颯秋雨中淺淺石溜瀉跳波自相濺白鷺鷥復
下

瀨聲喧極浦
泐涉向南津
汎汎鳧鷖渡
時時欲近人

裴迪

金屑泉

日飲金屑泉
少當千餘歲
翠鳳翊文螭
羽節朝玉帝

裴迪

縈滄澹不流
金碧如可拾
迎晨含素華
獨往事朝汲

白石灘

清淺白石灘
綠蒲向堪把
家住水東西
浣紗明月下

裴迪

跂石復臨水
弄波情未極
日下川上寒
浮雲澹無色

北垞

北垞湖水北
雜樹映朱欄
逶迤南川水
明滅青林端

南山北垞下結宇臨歌湖每欲採樵去扁舟出菰蒲

裴迪

竹里館

獨坐幽篁裏彈琴復長嘯深林人不知明月來相照

裴迪

來過竹里館日與道相親出入惟山鳥幽深無世人

辛夷塢

木末芙蓉花山中發紅萼澗戶寂無人紛紛開且落

裴迪

亂綠堤春草合王孫自留翫況有辛夷花色與芙蓉

漆園

古人非傲吏自闕經世務偶寄一微官婆婆娑數株樹

好閒早成性果此諧宿諾今日漆園遊還同莊叟
樂

裴迪

椒園

桂尊迎帝子杜若贈佳人椒漿奠瑶席欲下雲中
君

裴迪

丹刺骨人衣芳香留過客幸堪調鼎用願君垂採
摘

皇甫嶽雲溪禱題五首

鳥鳴磻

人閒桂花落夜靜春山空月出驚山鳥時鳴春澗
中

蓮花塢

日日採蓮去洲長多暮歸弄篙莫濺水畏濕紅蓮
衣

鷓鴣堰

乍向紅蓮沒復出清浦颺獨立何襜褕銜魚古查

上

上平田

朝耕上平田暮耕上平田借問問津者寧知沮溺賢

萍池

春池深且廣會待輕舟迴靡靡綠萍合垂楊掃復開

輞口遇雨憶終南山因獻絕句

裴迪

積雨晦空曲平沙滅浮彩輞水去悠悠南山復何在

荅裴迪

森森寒流廣蒼蒼秋雨晦君問終南山心知白雲外

山中寄諸弟妹

山中多法侶禪誦自為羣城郭遙相望唯應見白雲

聞裴秀才迪吟詩因戲贈

猿吟一何苦愁朝復悲夕莫作巫峽聲腸斷秋江
客

贈韋穆十八

與君青眼客共有白雲心不向東山去日令春草
深

送別

山中相送罷日暮掩柴扉春草年年綠王孫歸不
歸

臨高臺送黎拾遺

相送臨高臺川原杳何極日暮飛鳥還行人去不
息

別輞川別業

依遲動車馬惆悵出松蘿忍別青山去其如綠水
何

同前

王縉

山月曉仍在林風涼不絕殷勤如有情惆悵令人
別

崔九弟欲往南山馬上口號與別

城隅一分手幾日還相見
山中有桂花莫待花如
霰

同前

裴迪

歸山深淺去須盡
丘壑美莫學武陵人
暫遊相源裏

留別

崔興宗

駐馬欲分襟清寒御溝上
前山景氣佳獨往還
惆悵

息夫人

莫以今時寵能忘舊日恩
看花滿眼淚不共楚王
言

班婕妤三首

玉牕螢影度金殿
人聲絕秋夜守羅帷
孤燈耿不滅

宮殿生秋草君王恩幸
踈那堪聞鳳吹門外
度金輿

怪來粧閣閉朝下不相
迎總向春園裏花間
語笑聲

題友人雲母障子

君家雲母障時向野庭開自有山泉入非因采畫
來

紅牡丹

綠豔閒且靜紅衣淺復深花心愁欲斷春色豈知
心

左掖梨花

閒灑堦邊草輕隨箔外風黃鶯弄不足銜入未央
宮

同前

丘為

冷艷全欺雪餘香乍入衣春風且莫定吹向玉階
飛

同前

皇甫冉

巧解迎人笑偏能亂蝶飛春風時入戶幾片落朝
衣

口號又示裴迪

安得捨塵網拂衣辭世喧悠然策藜杖歸向桃花
源

雜詩

家住孟津河門對孟津口常有江南船寄書家中
否
君自故鄉來應知故鄉事來日綺牕前寒梅着花
未
已見寒梅發復聞啼鳥聲心心視春草畏向階前
生

崔興宗寫真詠

畫君年少時如今君已老今時新識人知君舊時

好

山茱萸

朱實山下開清香寒更發幸有叢桂花牕前向秋
月

哭孟浩然

故人不可見漢水日東流借問襄陽老江山空蔡
州

太平詞二首

風俗今和厚君王在穆清行看探花曲盡是太階

平

聖德超千古皇威靜四方蒼生今息戰無事覺時長

遊春曲二首

萬樹江邊杏新開一夜風滿園深淺色照在綠波中

上苑無窮樹花開次第新香車與絲騎風靜亦生塵

送春辭

日日人空老年年春更歸相歡在尊酒不用惜花飛

寒上曲二首

天驕遠塞行出鞘寶刀鳴定是酬恩日今朝覺命輕

塞虜常爲敵邊風已報秋平生多志氣箭底覓封侯

從軍辭二首

簇甲從軍久風雲識陳難今朝拜韓信計日斬成

安

燕領多奇相狼頭敢犯邊寄言班定遠正是立功年

隴上行

秋 負羽到邊州鳴笳度隴頭雲黃知塞近草白見邊

閨人贈遠五首

人 花明綺陌春柳拂御溝新爲報遼陽客流芳不待

遠 成功名薄幽閨年貌傷粧成對春樹不語淚千行

遠 啼鶯綠樹深語驚雕梁晚不省出門行沙場知近

雲 形影一朝別煙波千里分君看望君處祇是起行

光 洞房今夜月如練復如霜爲照離人恨亭亭到曉

六言絕句

田園樂七首

厭見千門萬戶經過北里南鄰官府鳴珂有底崆峒散髮何人

再見封侯萬戶立談賜璧一雙詎勝耦耕萬畝何如高卧東窓

採菱渡頭風急策杖林西日斜杏樹壇邊漁父桃花源裏人家

萋萋春草秋綠落落長松夏寒牛羊自歸村巷童稚不識衣冠

山下孤煙遠村天邊獨樹高原一瓢顏回陋巷五柳先生對門

桃紅復含宿雨柳綠更帶春煙花落家僮未掃鶯啼山客猶眠

酌酒會臨泉水抱琴好倚長松南園露葵朝折東谷黃梁夜春

七言絕句

獻壽詞

宮殿參差列九重祥雲瑞氣捧堦濃微臣欲獻唐

堯壽遙指南山對袞龍

遊春詞二首

曲江絲柳變煙條寒谷冰隨暖氣銷纔見春光生
綺陌已聞清樂動雲韶

經過柳陌與桃溪尋逐春光着處迷鳥度時時衝
絮起花繁充充壓枝低

秋思二首

網軒涼吹動輕衣夜聽更生玉漏稀月度天河光
轉濕鵲驚秋樹葉頻飛

宮連太液見滄波暑氣微消秋意多一夜輕風蘋
末起露珠翻盡滿池荷

從軍辭

髦頭夜落捷書飛來奏金門看賜衣白馬將軍頻
破敵黃龍戍卒幾時歸

塞下曲二首

辛苦幾出黃花戍迢遞初隨細柳繁塞晚每愁殘
月苦邊愁更逐斷蓬驚

年少辭家從冠軍金裝寶劍去邀勳不知馬骨傷

寒水唯見龍城起暮雲

平戎辭二首

太白秋高助後兵長風夜卷虜塵清男兒解却腰
間劍喜見從王道化平

卷旆生風喜氣新早持龍節靜邊塵漢家天子圖
麟閣身是當今第一人

贈遠二首

當年只自守空帷夢見關山覺別離不見鄉書傳
鴈足唯看新月吐蛾眉

厭攀楊柳臨青閣閒採芙蓉渠傍碧潭走馬臺邊人
不見拂雲堆畔戰初酣

閨人春思

愁見遙空百丈絲春風挽斷更傷離閒花落盡青
苔地盡日無人誰得知

秋夜曲二首

丁丁漏水夜何長漫漫輕雲露月光秋逼暗蟲通
夕響寒衣未寄莫飛霜

桂魄初生秋露微輕羅已薄未更衣銀箏夜久殷

勤弄心怯空房不忍歸

少年行四首

新豐美酒斗十千咸陽遊俠多少少年相逢意氣爲
君飲繫馬高樓垂柳邊

出身仕漢羽林郎初隨驃騎戰漁陽孰知不向邊
庭苦縱死猶聞俠骨香

一身能擘兩雕弧虜騎千重只似無偏坐金鞍調
白羽紛紛射殺五單于

漢家君臣歡宴終高議雲臺論戰功天子臨軒賜

侯印將軍佩出明光宮

寄河上段十六

與君相見卽相親聞道君家在孟津爲見行舟試
借問客中時有洛陽人

贈裴旻將軍

腰間寶劍七星文臂上瑠弓百戰勲見說雲中擒
黠虜始知天上有將軍

九月九日憶山東兄弟

獨在異鄉爲異客每逢嘉節倍思親遙知兄弟登

高處遍插茱萸少一人

戲題輞川別業

柳條拂地不須折
松樹披雲從更長
藤花欲暗藏
猱子栢葉初齊養麝香

戲題盤石

可憐盤石臨泉水
復有垂楊拂酒杯
若道春風不解意
何因吹送落花來

與盧賁外象過崔處士興宗林亭

綠樹重陰蓋四鄰
青苔日厚自無塵
科頭箕踞長

松下白眼看他世上人

同前

盧象

映竹時聞轉轆轤
當窓只見網蜘蛛
主人非病常
高卧環堵蒙籠一老儒

同前

王縉

身名不問十年餘
老大誰能更讀書
林中獨酌鄰
家酒門外時聞長者車

同前

裴迪

喬柯門裏自成陰
散髮窓中曾不簪
逍遙且喜從

吾事榮寵從來非我心

酬前

崔興宗

窮巷空林常閉關悠然獨卧對前山今朝忽枉稽
生駕倒屣開門遙解顏

送王尊師歸蜀中

大羅天上神仙客濯錦江頭花柳春不爲碧雞稱
使者唯令白鶴報鄉人

送元二使安西

渭城朝雨裊輕塵客舍青青柳色春勸君更盡一

杯酒西出陽關無故人

送別

送君南浦淚如絲君向東州使我悲爲報故人顛
顛盡如今不似洛陽時

送韋評事

欲逐將軍取右賢沙場走馬向居延遙知漢使蕭
關外愁見孤城落日邊

靈雲池送從弟

金杯緩酌清歌轉畫舸輕移豔舞迴自嘆鵲鷓臨

水別不同鴻鴈向池來

送沈子歸江東

楊柳渡頭行客稀
吾師盪漿向臨圻
唯有相思似春色
江南江北送春歸

寒食汜上作

廣武城邊逢暮春
汶陽歸客淚沾巾
落花寂寂啼山鳥
楊柳青青渡水人

劇嘲史寰

清風細雨濕梅花
驟馬先過碧玉家
正值楚王宮

裏至門前初下七香車

菩提寺禁裴迪來相看
說逆賊等凝碧池
上作音樂供奉人等舉聲便一時
淚下私成口號誦示裴迪

萬戶傷心生野煙
百官何日更朝天
秋槐葉落空宮裏
凝碧池頭奏管絃

涼州賽神

涼州城外少行人
百尺峰頭望虜塵
健兒擊鼓吹羌笛
共賽城東越騎神

哭殷遙

送君返葬石樓山松柏蒼蒼賓馭還埋骨白雲長
已矣空餘流水向人間

方九叙 謝敏行 沈仕 朱永年

王應辰 聞得仁 王一夔 張遜膚

王杵果 王杵杲 侯一麟 同閱

王摩詰集卷下



